

論語類編例言

一方今論語ノ書ハ中等程度ノ教科書トシテ普ク海内ニ行
ハル然レモ其書編次ノ方初學ノ士ニ適セズ一篇ノ中或
ハ忠信ヲ説キ或ハ爲政ヲ談ジ或ハ禮樂ヲ語り紛紛雜出
頗ル槩括ニ難シ此ノ如キハ決シテ中等教育ノ要ヲ得タ
ルモノニ非ズ是編者ガ固陋寡聞ヲ顧ミズシテ此書ヲ叙
セシ所以ナリ

一孔子人ヲ教フルノ道平易適實ヲ主トス故ニ其言人ニ依
リテ方ヲ設ケ或ハ之ヲ左ヨリシ或ハ之ヲ右ヨリシ未必
シモ其本末先後ニ拘拘タラズ乃チ夫ノ孝ヲ説キテ或ハ
色難ト曰ヒ或ハ敬別ト曰ヒ或ハ憂疾無違ト曰ヒシガ如
キ皆問者ノ性習ニ由テ言ヲ異ニセシノミ所謂仁知所謂
爲政皆然ラザルハナシ是ヲ以テ其語一斑ニ過ギザルガ



如キモ類シテ之ヲ彙メ通シテ之ヲ釋ヌレバ則チ道ノ全
 豹自ラ心目ニ歴歷タリ是類編ノ講究ニ便ナル所以ナリ
 一本編開卷先ツ孝弟忠信崇德ノ要ヲ述ベ第二編ニ於テ治
 人ノ方ヲ説ク乃チ治人ト云フト雖亦皆誠意修己ノ效ノ
 ミ第三篇ニ至テ之ヲ前言往行ニ照シテ其得失ヲ考ヘ其
 長短ヲ觀ル茲ニ以テ斯道ノ体用ヲ識ルベシ然レモ未盡
 サバル所アリ夫レ聖ハ仁ノ至、夫子ハ乃チ道ノ形ニシテ
 門人ハ其一体ナリ蓋師弟申天閭侃ノ際精神流通以テ斯
 道ノ極致ヲ發スルニ足ルモノアリ故ニ第四篇ニ於テ門
 人ヲ説キ第五篇ニ於テ孔子ノ世家學德行藏ヲ叙シ以テ
 本編ヲ結ベリ
 一此編章ヲ以テ語ヲ分チシノミナラズ一章中ニ於ケル語
 ト語トノ順序先後モ亦頗ル意ヲ致セリ又各章中往往○
 チ以テ行ヲ隔テタルハ語意ノ廣狹遠近自ラ異ル所アル

モ別ニ一題目ヲ附スルニ至ラザルモノナリ
 一本編註解及ビ送り假名ヲ附セザルハ抑亦説アリ夫レ倫
 理科ニ於テ論語ヲ授クルハ一語一句丁寧反覆譬ヲ取リ
 例ヲ設ケ以テ之ヲ躬行實踐ニ資スベキモノナレバ一日
 授クル所多シト雖數語ニ過ギザルベシ生徒モ亦諷誦爛
 熟シテ神解ヲ求メザルベカラズ此點ヨリ之ヲ言ヘバ白
 文ナリトモ可ナリ何ゾ註解訓釋ヲ要センヤ
 一聖賢ノ教語近クシテ旨遠ク一ヲ説キテ百ニ通ズ拘スル
 ニ一題目ヲ以テスベカラザルモノ多シ故ニ言行ト云ヒ
 仁知ト云フモ姑ク其意ノ近キト語ノ明カナルトチ取リ
 相類次シテ初學ニ資セシノミ若シ夫レ斯道一貫ノ義ニ
 至リテハ教師其人ノ近譬ノ方不倦ノ誨ニ須ツアリト云
 爾
 一近時學風輕佻ニ流レ潛心工夫ノ效ヲ識ルモノ漸ク希ナ

リ故ニ學生ノ論語ヲ讀ムモノ動モスレバ其語ノ平易奇
 ナキヲ見テ流讀一過輒チ諸ヲ高閣ニ束ヌルモノ多シ此
 輩ノ如キハ程子が所謂不曾讀ノ徒ノミ昔者宋ノ趙普太
 宗ニ謂テ曰ク臣論語半篇ヲ以テ太祖ヲ佐ケテ業ヲ創メ
 半篇ヲ以テ陛下ヲ相ケテ治ヲ成セリト趙普且然リ況ン
 ヤ聖賢ヲヤ斯道ノ妙用ハ窮極アラザルナリ

松田東識

論語類編目次

第一編 修身

第一章 子道

第二章 友道

第三章 言行

慎言

自省

汎說

第四章 學問

第五章 仁知義勇

第六章 士君子

士

君子

君子小人

第七章 總說

道德

禮樂 喪祭

訓戒

第二編 治人

第一章 君臣

第二章 為政

正身

德刑

知人

汎說

第三編 前言往行

第四編 門人

第五編 孔子

第一章 世家

第二章 學德

第三章 教誨

第四章 處世

第五章 禮容

第六章 頌

附錄 論語序

論語類編目次終

論語類編

松田東編次
井口榮治參校

第一篇 修身

第一章 子道

○子游問孝。子曰。今之孝者。是謂能養。至於犬馬。皆能有養。不敬何以別乎。為政

○子夏問孝。子曰。色難。有事弟子服其勞。有酒食

先生饌。曾是以為孝乎。為政

○孟武伯問孝。子曰。父母唯其疾之憂。為政

○子曰。父母在。不遠遊。遊必有方。里仁

○子曰。事父母幾諫。見志不從。又敬不違。勞而不

怨。里仁

○葉公語孔子曰。吾黨有直躬者。其父攘羊。而子

證之。孔子曰。吾黨之直者異於是。父為子隱。子為

父隱。直在其中矣。子路

○子曰。孝哉閔子騫。人不間於其父母昆弟之言。

先進

○子曰。父母之年。不可不知也。一則以喜。一則以

懼。里仁

○子曰。父在觀其志。父沒觀其行。三年無改於父

之道。可謂孝矣。學而

○曾子曰。吾聞諸夫子。孟莊子之孝也。其他可能

也。其不改父之臣與父之政。是難能也。子張

○孟懿子問孝。子曰。無違。樊遲御。子告之曰。孟孫

問孝於我。我對曰。無違。樊遲曰。何謂也。子曰。生事

之以禮。死葬之以禮。祭之以禮。為政

○

○有子曰。其為人孝弟而好犯上者鮮矣。不好

犯上而好作亂者。未之有也。君子務本。本立而道

生。孝弟也者其爲仁之本與。學而

○或謂孔子曰。子奚不爲政。子曰。書云。孝乎。惟孝友于兄弟。施於有政。是亦爲政。奚其爲爲政。爲政

第二章 友道

○子貢問爲仁。子曰。工欲善其事。必先利其器。居是邦也。事其大夫之賢者。友其士之仁者。衛靈公

○曾子曰。君子以文會友。以友輔仁。顏淵

○孔子曰。益者三友。損者三友。友直。友諒。友多聞。益矣。友便辟。友善柔。友便佞。損矣。季氏

○子曰。三人行必有我師焉。擇其善者而從之。其不善者而改之。述而

○子曰。道不同不相爲謀。衛靈公

○子夏之門人問交於子張。子張曰。子夏云何。對

曰。子夏曰。可者與之。其不可者拒之。子張曰。異乎。吾所聞。君子尊賢而容衆。嘉善而矜不能。我之大賢與。於人何所不容。我之不賢與。人將拒我。如之何其拒人也。子張

○子貢問友。子曰。忠告而善道之。不可則止。無自辱焉。顏淵

○子游曰。事君數斯辱矣。朋友數斯疏矣。里仁

○子曰。巧言令色足恭。左丘明恥之。丘亦恥之。慝怨而友其人。左丘明恥之。丘亦恥之。公治長

○子曰。晏平仲善與人交。久而敬之。公治長

第三章 言行

慎言

○子貢問君子。子曰。先行其言而後從之。為政

○子曰。君子欲訥於言而敏於行。里仁

○子曰。君子恥其言而過其行。憲問

○子曰。古者言之不出。恥躬之不逮也。里仁

○子曰。其言之不怍。則為之也難。憲問

○司馬牛問仁。子曰。仁者其言也訥。曰。其言也訥。斯謂之仁矣乎。子曰。為之難。言之得無訥乎。顏淵

○孔子曰。侍於君子。有三愆。言未及之而言。謂之躁。言及之而不言。謂之隱。未見顏色而言。謂之瞽。季氏

○子曰。可與言而不與之言。失人。不可與言而與之言。失言。知者不失人。亦不失言。衛靈公

○孔子於鄉黨。恂恂如也。似不能言者。其在宗廟朝廷。便便言。唯謹爾。鄉黨

○南容三復白圭。孔子以其兄之子妻之。先進

自省

○子曰。已矣乎。吾未見能見其過而內自訟者也。

公冶長

○子曰。過而不改。是謂過矣。衛靈公

○子曰。君子之過也。如日月之食焉。過也。人皆見之。更也。人皆仰之。子張

○子夏曰。小人之過也必文。子張

○

○曾子曰。吾日三省吾身。為人謀而不忠乎。與朋友交而不信乎。傳不習乎。學而

○子曰。見賢思齊焉。見不賢而內自省也。里仁

○子曰。躬自厚而薄責於人。則遠怨矣。衛靈公

○司馬牛問君子。子曰。君子不憂不懼。日不憂不

懼。斯謂之君子矣乎。子曰。內省不疚。夫何憂何懼。淵

汎說

○有子曰。信近於義。言可復也。恭近於禮。遠恥辱也。因不失其親。亦可宗也。學而

○子曰。人而無信。不知其可也。大車無輓。小車無軌。其何以行之哉。為政

○子曰。君子不重則不威。學則不固。主忠信。無友不如己者。過則勿憚改。學而

○子張問行。子曰。言忠信。行篤敬。雖蠻貊之邦行矣。言不忠信。行不篤敬。雖州里行乎哉。立則見其

參於前也。在輿則見其倚於衡也。夫然後行。子張

書諸紳。衛靈公

○樊遲問。仁。子曰。居處恭。執事敬。與人忠。雖之夷狄。不可棄也。子路

○子張學干祿。子曰。多聞闕疑。慎言其餘。則寡尤。多見闕疑。慎行其餘。則寡悔。言寡尤。行寡悔。祿在

其中。為政

○子曰。由。誨女知之乎。知之為知之。不知為不知。是知也。為政

○子曰。法語之言。能無從乎。改之為貴。巽與之言。

能無說乎。繹之為貴。說而不繹。從而不改。吾未如之何也已矣。子罕

○子曰。不曰如之何。如之何者。吾未如之何也已矣。衛靈公

○子曰。以約失之者鮮矣。里仁

第四章 學問

○子夏曰。賢賢易色。事父母能竭其力。事君能致其身。與朋友交。言而有信。雖曰未學。吾必謂之學矣。學而

○子曰。弟子入則孝。出則弟。謹而信。汎愛衆而親仁。行有餘力。則以學文。學而

○

○子夏曰。百工居肆以成其事。君子學以致其道。子張

○子曰。吾嘗終日不食。終夜不寢。以思。無益。不如學也。衛靈公

○子曰。學而不思則罔。思而不學則殆。為政

○子曰。由也。女聞六言六蔽矣乎。對曰。未也。居。吾語女。好仁不好學。其蔽也愚。好知不好學。其蔽也蕩。好信不好學。其蔽也賊。好直不好學。其蔽也絞。好勇不好學。其蔽也亂。好剛不好學。其蔽也狂。陽貨

○孔子曰。生而知之者上也。學而知之者次也。困而學之。又其次也。困而不學。民斯為下矣。季氏

○子曰。知之者不如好之者。好之者不如樂之者。雍也
○子夏曰。日知其所亡。月無忘其所能。可謂好學也已矣。子張

○子曰。君子食無求飽。居無求安。敏於事。慎於言。就有道而正焉。可謂好學也已。學而

○子曰。賢哉回也。一簞食。一瓢飲。在陋巷。人不堪其憂。回也不改其樂。賢哉回也。雍也

○子曰。士志於道。而恥惡衣惡食者。未足與議也。里仁

○子曰。學如不及。猶恐失之。泰伯

○子曰。當仁不讓於師。衛靈公

○子曰。朝聞道。夕死可矣。里仁

○子路有聞未之能行。唯恐有聞。公冶長

○子曰。譬如爲山。未成一簣。止吾止也。譬如平地。雖覆一簣。進吾往也。子罕

○子在川上曰。逝者如斯夫。不舍晝夜。子罕

○子曰。語之而不惰者。其回也與。子罕

○子謂顏淵曰。惜乎。吾見其進也。未見其止也。子罕

○冉求曰。非不說子之道。力不足也。子曰。力不足者。中道而廢。今女畫。雍也

○子曰。後生可畏。焉知來者之不如今也。四十五十而無聞焉。斯亦不足畏也。子罕

○子曰。年四十而見惡。其終也已。陽貨

○子曰。苗而不秀者。有矣。秀而不實者。有矣夫。子罕

○子曰。古之學者爲己。今之學者爲人。憲問

○子曰。學而時習之。不亦說乎。有朋自遠方來。不

亦樂乎。人不知而不愠。不亦君子乎。學而

○子曰。不患人之不己知。患其不能也。憲問

○子曰。君子病無能焉。不病人之不己知也。衛靈公

○子曰。不患無位。患所以立。不患莫己知。求爲可

知也。里仁

○子曰。三年學。不至穀。不易得也。泰伯

○子使漆雕開仕。對曰。吾斯之未能信。子說。公治長

○子夏曰。仕優則學。學優則仕。子張

○曾子曰。以能問於不能。以多問於寡。有若無。實

若虛。犯而不校。昔者吾友嘗從事於斯矣。泰伯

○子曰。君子博學於文。約之以禮。亦可以弗畔矣

夫。雍也

○子夏曰。博學而篤志。切問而近思。仁在其中矣。子張

○子曰。溫故而知新。可以為師矣。為政

○子曰。德之不修。學之不講。聞義不能徙。不善不

能改。是吾憂也。述而

○子曰。君子謀道不謀食。耕也。餒在其中矣。學也。

祿在其中矣。君子憂道不憂貧。衛靈公

第五章 仁知 義勇

○子曰。我未見好仁者。惡不仁者。好仁者無以加之。惡不仁者其爲仁矣。不使不仁者加乎其身上。能一日用其力於仁矣乎。我未見力不足者。蓋有之矣。我未之見也。里仁

○子曰。民之於仁也。甚於水火。水火吾見蹈而死者。未見蹈仁而死者也。衛靈公

○子曰。富與貴。是人之所以欲也。不以其道得之。不處也。貧與賤。是人之所以惡也。不以其道得之。不去也。君子去仁惡乎成名。君子無終食之間違仁。造

次必於是。顛沛必於是。里仁

○子曰。苟志於仁矣。無惡也。里仁

○顏淵季路侍。子曰。盍各言爾志。子路曰。願車馬衣輕裘。與朋友共。敝之而無憾。顏淵曰。願無伐善。無施勞。子路曰。願聞子之志。子曰。老者安之。朋友信之。少者懷之。公冶長

○子曰。回也。其心三月不違仁。其餘則日月至焉而已矣。雍也

○子曰。剛毅木訥近仁。子路

○子曰。仁遠乎哉。我欲仁斯仁至矣。述而

○唐棣之華。偏其反而。豈不爾思。室是遠而。子曰。未之思也。夫何遠之有。子罕

○顏淵問仁。子曰。克己復禮。爲仁。一日克己復禮。天下歸仁焉。爲仁由己。而由人乎哉。顏淵曰。請問其目。子曰。非禮勿視。非禮勿聽。非禮勿言。非禮勿動。顏淵曰。回雖不敏。請事斯語矣。顏淵

○子曰。知及之。仁不能守之。雖得之。必失之。知及之。仁能守之。不莊以涖之。則民不敬。知及之。仁能守之。莊以涖之。動之不以禮。未善也。衛靈公

○仲弓問仁。子曰。出門如見大賓。使民如承大祭。

己所不欲。勿施於人。在邦無怨。在家無怨。仲弓曰。雍雖不敏。請事斯語矣。顏淵

○子貢曰。我不欲人之加諸我也。吾亦欲無加諸人。子曰。賜也。非爾所及也。公冶長

○子貢曰。如有博施於民。而能濟衆。何如。可謂仁乎。子曰。何事於仁。必也聖乎。堯舜其猶病諸。夫仁者。己欲立而立人。己欲達而達人。能近取譬。可謂仁之方也已。雍也

○克伐怨欲不行焉。可以爲仁矣。子曰。可以爲難矣。仁則吾不知也。憲問

○宰我問曰。仁者雖告之曰。井有仁焉。其從之也。子曰。何爲其然也。君子可逝也。不可陷也。可欺也。不可罔也。雍也

○或曰。雍也。仁而不佞。子曰。焉用佞。禦人以口給。屢憎於人。不知其仁焉。用佞。公冶長

○子曰。巧言令色。鮮矣仁。陽貨

○

○子曰。里仁爲美。擇不處仁。焉得知。里仁

○樊遲問。知。子曰。務民之義。敬鬼神而遠之。可謂知矣。問仁。曰。仁者先難而後獲。可謂仁矣。雍也

○子曰。知者樂水。仁者樂山。知者動。仁者靜。知者樂。仁者壽。雍也

○子曰。不仁者不可以久。處約不可以長。處樂仁者安仁。知者利仁。里仁

○子曰。知者不惑。仁者不憂。勇者不懼。子罕

○子曰。非其鬼而祭之。諂也。見義不爲。無勇也。爲政

○子路曰。君子尚勇乎。子曰。君子義以爲上。君子有勇而無義。爲亂。小人有勇而無義。爲盜。陽貨

○子曰。飯疏食飲水。曲肱而枕之。樂亦在其中矣。不義而富且貴。於我如浮雲。述而

○子曰。君子之於天下也。無適也。無莫也。義之與比。里仁

第六章 士君子

士

○子路問曰。何如斯可謂之士矣。子曰。切々悃悃。怡怡如也。可謂士矣。朋友切切悃悃。兄弟怡怡。子路

○子貢問曰。何如斯可謂之士矣。子曰。行己有恥。使於四方。不辱君命。可謂士矣。曰。敢問其次。曰。宗族稱孝焉。鄉黨稱弟焉。曰。敢問其次。曰。言必信。行必果。硜硜然小人哉。抑亦可以爲次矣。曰。今之從政者何如。子曰。噫。斗筲之人。何足算也。子路

○子張問。士何如斯可謂之達矣。子曰。何哉。爾所

謂達者。子張對曰。在邦必聞。在家必聞。子曰。是聞也。非達也。夫達也者。質直而好義。察言而觀色。慮以下人。在邦必達。在家必達。夫聞也者。色取仁而

行違。居之不疑。在邦必聞。在家必聞。顏淵

○子曰。士而懷居。不足以爲士矣。憲問

○曾子曰。士不可以不弘毅。任重而道遠。仁以爲己任。不亦重乎。死而後已。不亦遠乎。泰伯

○子張曰。士見危致命。見得思義。祭思敬。喪思哀。

其可已矣。子張

○子曰。南人有言曰。人而無恒。不可以作巫醫。善

夫。不恒其德。或承之羞。子曰。不占而已矣。子路

○子曰。聖人吾不得而見之矣。得見君子者。斯可矣。善人吾不得而見之矣。得見有恒者。斯可矣。亡

而爲有。虛而爲盈。約而爲泰。難乎有恒矣。述而

○子曰。志士仁人。無求生以害仁。有殺身以成仁。

衛靈公

君子

○子曰。君子義以爲質。禮以行之。孫以出之。信以成之。君子哉。衛靈公

○子路問君子。子曰。修己以敬。曰。如斯而已乎。曰。

修己以安人。曰。如斯而已乎。曰。修己以安百姓。修己以安百姓。堯舜其猶病諸。憲問

○子曰。君子不器。爲政

○子曰。君子貞而不諒。衛靈公

○子曰。君子矜而不爭。群而不黨。衛靈公

○子曰。君子無所爭。必也射乎。揖讓而升。下而飲。

其爭也君子。八佾

○孔子曰。君子有九思。視思明。聽思聰。色思溫。貌

思恭。言思忠。事思敬。疑思問。忿思難。見得思義。季氏

○子貢曰。君子有三變。望之儼然。卽之也溫。聽其

言也厲。子張

○子溫而厲。威而不猛。恭而安。述而

○曾子有疾。孟敬子問之。曾子言曰。鳥之將死。其

鳴也哀。人之將死。其言也善。君子所貴乎道者三。

動容貌。斯遠暴慢矣。正顏色。斯近信矣。出辭氣。斯

遠鄙倍矣。籩豆之事。則有司存。泰伯

○子曰。質勝文則野。文勝質則史。文質彬彬。然後

君子。雍也

○棘子成曰。君子質而已矣。何以文爲。子貢曰。惜

乎夫子之說君子也。駟不及舌。文猶質也。質猶文

也。虎豹之鞞。猶犬羊之鞞。顏淵

○子曰。文莫吾猶人也。躬行君子。則吾未之有得。述

○曾子曰。可以託六尺之孤。可以寄百里之命。臨

大節而不可奪也。君子人與。君子人也。泰伯

君子小人

○子曰。君子周而不比。小人比而不周。為政

○子曰。君子和而不同。小人同而不同。子路

○子曰。君子喻於義。小人喻於利。里仁

○子曰。君子懷德。小人懷土。君子懷刑。小人懷惠。里仁

○子曰。君子坦蕩蕩。小人長戚戚。述而

○子曰。君子泰而不驕。小人驕而不泰。子路

○子曰。君子易事而難說也。說之不以道。不說也。

及其使人也。器之。小人難事而易說也。說之雖不

以道。說也。及其使人也。求備焉。子路

○子曰。君子不可小知。而可大受也。小人不可大

受。而可小知也。衛靈公

○子曰。君子上達。小人下達。憲問

○子曰。君子求諸己。小人求諸人。衛靈公

○子謂子夏曰。汝為君子儒。無為小人儒。雍也

○孔子曰。君子有三畏。畏天命。畏大人。畏聖人之

言。小人不知天命而不畏也。狎大人。侮聖人之言。季氏
 ○子曰。君子成人之美。不成人之惡。小人反是。顏淵
 ○子曰。君子而不仁者有矣。未有小人而仁者也。憲問

第七章 總說

道德

○子曰。志於道。據於德。依於仁。游於藝。述而
 ○子曰。人能弘道。非道弘人。衛靈公
 ○子張曰。執德不弘。信道不篤。焉能為有。焉能為

亡。子張

○子曰。誰能出不由戶。何莫由斯道也。雍也
 ○子曰。中庸之為德也。其至矣乎。民鮮久矣。雍也
 ○子曰。已矣乎。吾未見好德如好色者也。衛靈公
 ○子曰。由。知德者鮮矣。衛靈公

○子曰。德不孤。必有鄰。里仁

○司馬牛憂曰。人皆有兄弟。我獨亡。子夏曰。商聞之矣。死生有命。富貴在天。君子敬而無失。與人恭而有禮。四海之內皆兄弟也。君子何患乎無兄弟也。顏淵

○子張問崇德辨惑。子曰。主忠信。徙義。崇德也。愛之欲其生。惡之欲其死。既欲其生。又欲其死。是惑也。顏淵

○樊遲從遊於舞雩之下。曰。敢問崇德脩慝辨惑。子曰。善哉問。先事後得。非崇德與。攻其惡無攻人

之惡。非脩慝與。一朝之忿。忘其身。以及其親。非惑與。顏淵

○子游曰。子夏之門人小子。當洒掃應對進退。則可矣。抑末也。本之則無。如之何。子夏聞之曰。噫言游過矣。君子之道。孰先傳焉。孰後倦焉。譬諸草木。區以別矣。君子之道。焉可誣也。有始有卒者。其惟聖人乎。子張

○子貢問曰。有一言而可以終身行之者乎。子曰。其恕乎。己所不欲。勿施於人。衛靈公

禮樂 喪祭

○子所雅言。詩書執禮。皆雅言也。述而

○子曰。興於詩。立於禮。成於樂。泰伯

○

○子曰。小子何莫學夫詩。詩可以興。可以觀。可以群。可以怨。邇之事父。遠之事君。多識於鳥獸草木之名。陽貨

○子曰。詩三百。一言以蔽之。曰。思無邪。為政

○子曰。關雎樂而不淫。哀而不傷。八佾

○子謂伯魚曰。女為周南召南矣乎。人而不為周

南召南。其猶正牆面而立也與。陽貨

○子曰。誦詩三百。授之以政。不達。使於四方。不能專對。雖多亦奚以為。子路

○陳亢問於伯魚曰。子亦有異聞乎。對曰。未也。嘗獨立。鯉趨而過庭。曰。學詩乎。對曰。未也。不學詩。無以言。鯉退而學詩。他日又獨立。鯉趨而過庭。曰。學禮乎。對曰。未也。不學禮。無以立。鯉退而學禮。聞斯二者。陳亢退而喜曰。問一得三。聞詩。聞禮。又聞君子之遠其子也。季氏

○子貢曰。貧而無諂。富而無驕。何如。子曰。可也。未

若貧而樂。富而好禮者也。子貢曰。詩云。如切如磋。如琢如磨。其斯之謂與。子曰。賜也。始可與言詩已矣。告諸往而知來者。學而

○子夏問曰。巧笑倩兮。美目盼兮。素以爲絢兮。何謂也。子曰。繪事後素。曰。禮後乎。子曰。起予者商也。始可與言詩已矣。八倍

○子曰。師摯之始。關雎之亂。洋洋乎盈耳哉。泰伯

○子謂韶。盡美矣。又盡善也。謂武。盡美矣。未盡善也。八倍

○子在齊聞韶。三月不知肉味。曰。不圖爲樂之至

於斯也。述而

○子語魯大師樂。曰。樂其可知也。始作翕如也。從之純如也。皦如也。繹如也。以成。八倍

○子曰。人而不仁。如禮何。人而不仁。如樂何。八倍

○有子曰。禮之用。和爲貴。先王之道。斯爲美。小大由之。有所不行。知和而和。不以禮節之。亦不可行也。學而

○林放問禮之本。子曰。大哉問。禮與其奢也寧儉。喪與其易也寧戚。八倍

○子曰。先進於禮樂。野人也。後進於禮樂。君子也。

如用之。則吾從先進。先進

○子曰。禮云禮云。玉帛云乎哉。樂云樂云。鐘鼓云乎哉。陽貨

○子曰。麻冕禮也。今也純儉。吾從衆。拜下禮也。今拜乎上。泰也。雖違衆。吾從下。子罕

○曾子曰。吾聞諸夫子。人未有自致者。必也親喪乎。子張

○宰我問。三年之喪。斯已久矣。君子三年不爲禮。禮必壞。三年不爲樂。樂必崩。舊穀既沒。新穀既升。

鑽燧改火。期可已矣。子曰。食夫稻。衣夫錦。於女安乎。曰。安。女安則爲之。夫君子之居喪。食旨不甘。聞樂不樂。居處不安。故不爲也。今女安則爲之。宰我出。子曰。予之不仁也。子生三年。然後免於父母之懷。夫三年之喪。天下之通喪也。予也有三年之愛於其父母乎。陽貨

○子游曰。喪致乎哀而止。子張

○顏淵死。門人欲厚葬之。子曰。不可。門人厚葬之。子曰。回也視予猶父也。予不得視猶子也。非我也。夫二三子也。先進

○顏淵死。子哭之慟。從者曰。子慟矣。曰。有慟乎。非夫人之為慟。而誰為。先進

○顏淵死。顏路請子之車。以為之椁。子曰。才不才。亦各言其子也。鯉也死。有棺而無椁。吾不徒行。以為之椁。以吾從大夫之後。不可徒行也。先進

○子張曰。書云。高宗諒陰三年不言。何謂也。子曰。何必高宗。古之人皆然。君薨。百官總己以聽於冢

宰三年。憲問

○祭如在。祭神如神在。子曰。吾不與祭。如不祭。八佾

○季路問事鬼神。子曰。未能事人。焉能事鬼。敢問

死。曰。未知生。焉知死。先進

○或問禘之說。子曰。不知也。知其說者之於天下也。其如示諸斯乎。指其掌。八佾

○子曰。禘自既灌而往者。吾不欲觀之矣。八佾

○季氏旅於泰山。子謂冉有曰。女弗能救與。對曰。不能。子曰。嗚呼。曾謂泰山不如林放乎。八佾

○子貢欲去告朔之餼羊。子曰。賜也。爾愛其羊。我愛其禮。八佾

○曾子曰。慎終追遠。民德歸厚矣。學而

訓戒

○子曰。不在其位。不謀其政。泰伯

○曾子曰。君子思不出其位。憲問

○子曰。邦有道。危言危行。邦無道。危行言孫。憲問

○憲問恥。子曰。邦有道。穀。邦無道。穀。耻也。憲問

○子曰。篤信好學。守死善道。危邦不入。亂邦不居。

天下有道則見。無道則隱。邦有道。貧且賤焉。恥也。

邦無道。富且貴焉。恥也。泰伯

○子曰。賢者辟世。其次辟地。其次辟色。其次辟言。憲問

○曾子有疾。召門弟子曰。啓予足。啓我手。詩云。戰

戰兢兢。如臨深淵。如履薄冰。而今而後。吾知免夫。

小子。泰伯

○

○子曰。不知命。無以爲君子也。不知禮。無以立也。

不知言。無知人。堯問

○子曰。有德者必有言。有言者不必有德。仁者必

有勇。勇者不必有仁。憲問

○子曰。論篤是與。君子者乎。色莊者乎。先進

○子曰。視其所以。觀其所由。察其所安。人焉廋哉。

人焉廋哉。爲政

○子曰。衆惡之。必察焉。衆好之。必察焉。衛靈公

○子貢問曰。鄉人皆好之。何如。子曰。未可也。鄉人皆惡之。何如。子曰。未可也。不如鄉人之善者好之。其不善者惡之。子路

○子曰。不逆詐。不億不信。抑亦先覺者。是賢乎。憲問

○子張問明。子曰。浸潤之譖。膚受之愬。不行焉。可謂明也已矣。浸潤之譖。膚受之愬。不行焉。可謂遠也已矣。顏淵

○

○孔子曰。見善如不及。見不善如探湯。吾見其人矣。吾聞其語矣。隱居以求其志。行義以達其道。吾

聞其語。未見其人也。季氏

○子曰。不得中行而與之。必也狂狷乎。狂者進取。狷者有所不為也。子路

○子曰。狂而不直。侗而不愿。慥慥而不信。吾不知之矣。泰伯

○子曰。色厲而內荏。譬諸小人。其猶穿窬之盜也與。陽貨

○子曰。鄉原德之賊也。陽貨

○子曰。群居終日。言不及義。好行小慧。難矣哉。衛靈公

○子曰。飽食終日。無所用心。難矣哉。不有博奕者

乎。為之猶賢乎已。陽貨

○子夏曰。雖小道。必有可觀者。致遠恐泥。是以君子不為也。子張

○子曰。君子疾沒世而名不稱焉。衛靈公

○孔子曰。益者三樂。損者三樂。樂節禮樂。樂道人氏之善。樂多賢友。益矣。樂驕樂。樂佚遊。樂宴樂。損矣。季

○子夏曰。君子亦有惡乎。子曰。有惡。惡稱人之惡者。惡居下流而訕上者。惡勇而無禮者。惡果敢而窒者。曰。賜也亦有惡乎。惡微以為知者。惡不孫以為勇者。惡訐以為直者。陽貨

○子曰。恭而無禮則勞。慎而無禮則蕙。勇而無禮則亂。直而無禮則絞。泰伯

○子曰。古者民有三疾。今也或是之亡也。古之狂也肆。今之狂也蕩。古之矜也廉。今之矜也忿戾。古之愚也直。今之愚也詐而已。陽貨

○子曰。女子小人為難養也。近之則不孫。遠之則怨。陽貨

○子曰。好勇疾貧。亂也。人而不仁。疾之已甚。亂也。泰伯

○子曰。奢則不孫。儉則固。與其不孫。寧固。述而

○子曰。如有周公之才之美。使驕且吝。其餘不足

觀也已。秦伯

○子曰。貧而無怨。難。富而無驕。易。憲問

○子張問善人之道。子曰。不踐迹。亦不入於室。先進

○子夏曰。大德不踰閑。小德出入可也。子張

○子曰。人之過也。各於其黨。觀過斯知仁矣。里仁

○子曰。仗於利行。多怨。里仁

○子曰。巧言亂德。小不忍。則亂大謀。衛靈公

○子曰。人無遠慮。必有近憂。衛靈公

○孔子曰。君子有三戒。少之時。血氣未定。戒之在色。及其壯也。血氣方剛。戒之在鬥。及其老也。血氣

既衰。戒之在得。季氏

○子曰。可與共學。未可與適道。可與適道。未可與立。可與立。未可與權。子罕

○子曰。道聽而塗說。德之棄也。陽貨

○子曰。不患人之不己知。患不知人也。學而

○子曰。惟仁者能好人。能惡人。里仁

○子曰。愛之能勿勞乎。忠焉能勿誨乎。憲問

○或曰。以德報怨。何如。子曰。何以報德。以直報怨。

以德報德。憲問

○子曰。驥不稱其力。稱德也。憲問

○子曰。射不主皮。爲力不同科。古之道也。八佾

○子曰。吾猶及史之闕文也。有馬者借人乘之。今

亡矣夫。衛靈公

○子曰。歲寒然後知松栢之後凋也。子罕

○子曰。三軍可奪帥也。匹夫不可奪志也。子罕

○子曰。辭達而已矣。衛靈公

第二篇 治人

第一章 君臣

○定公問。一言而可以興邦有諸。孔子對曰。言不可以若是其幾也。人之言曰。爲君難。爲臣不易。如知爲君之難也。不幾乎一言而興邦乎。曰。一言而喪邦有諸。孔子對曰。言不可以若是其幾也。人之言曰。予無樂乎爲君。唯其言而莫予違也。如其善而莫之違也。不亦善乎。如不善而莫之違也。不幾乎一言而喪邦乎。子路

○齊景公問政於孔子。孔子對曰。君君。臣臣。父父。

子子。公曰。善哉。信如君不君。臣不臣。父不父。子不子。雖有粟。吾得而食諸。顏淵

○定公問。君使臣。臣事君。如之何。孔子對曰。君使臣以禮。臣事君以忠。八佾

○子曰。事君敬其事。而後其食。衛靈公

○子路問事君。子曰。勿欺而犯之。憲問

○子曰。事君盡禮。人以為諂也。八佾

○周公謂魯公曰。君子不施其親。不使大臣怨乎

不以。故舊無大故。則不棄也。無求備於一人。微子

○陳司敗問。昭公知禮乎。孔子曰。知禮。孔子退。揖

巫馬期而進之。曰。吾聞君子不黨。君子亦黨乎。君

取於吳。為同姓。謂之吳孟子。君而知禮。孰不知禮。

巫馬期以告。子曰。丘也幸。苟有過。人必知之。述而

○季氏將伐顓臾。冉有季路見於孔子。曰。季氏將

有事於顓臾。孔子曰。求。無乃爾是過與。夫顓臾。昔

者先王以為東蒙主。且在邦域之中矣。是社稷之

臣也。何以伐為。冉有曰。夫子欲之。吾二臣者皆不

欲也。孔子曰。求。周任有言曰。陳力就列。不能者止。

危而不持。顛而不扶。則將焉用彼相矣。且爾言過

矣。虎兕出於柙。龜玉毀於櫝中。是誰之過與。冉有

曰。今夫顓臾。固而近於費。今不取。後世必爲子孫憂。孔子曰。求。君子疾夫舍曰欲之。而必爲之辭。丘也聞有國有家者。不患寡而患不均。不患貧而患不安。蓋均無貧。和無寡。安無傾。夫如是。故遠人不服。則脩文德以來之。既來之。則安之。今由與求也。相夫子。遠人不服。而不能來也。邦分崩離析。而不能守也。而謀動干戈於邦內。吾恐季孫之憂。不在顓臾。而在蕭牆之內也。季氏

○季子然問。仲由冉求可謂大臣與。子曰。吾以子爲異之間。曾由與求之間。所謂大臣者。以道事君。

不可則止。今由與求也。可謂具臣矣。曰。然則從之者與。子曰。弑父與君。亦不從也。先進

○子曰。鄙夫可與事君也與哉。其未得之也。患得之。既得之。患失之。苟患失之。無所不至矣。陽貨

第二章 爲政

正身

○子曰。無爲而治者其舜也與。夫何爲哉。恭己正南面而已矣。憲問

○季康子問政於孔子。孔子對曰。政者正也。子帥以正。孰敢不正。顏淵

○子曰。苟正其身矣。於從政乎何有。不能正其身。如正人何。子路

○子曰。其身正。不令而行。其身不正。雖令不從。子路

○子曰。上好禮。則民易使也。憲問

○子曰。能以禮讓爲國乎。何有。不能以禮讓爲國。如禮何。里仁

○樊遲請學稼。子曰。吾不如老農。請學爲圃。曰。吾不如老圃。樊遲出。子曰。小人哉。樊須也。上好禮。則民莫敢不敬。上好義。則民莫敢不服。上好信。則民莫不用情。夫如是。則四方之民。襁負其子而至矣。焉用稼。子路

○季康子患盜。問於孔子。孔子對曰。苟子之不欲。雖賞之不竊。顏淵

○曾子曰。君子篤親。則民興於仁。故舊不遺。則民

不偷。秦伯

德刑

○子曰。為政以德。譬如北辰居其所。而眾星共之。為政

○葉公問政。子曰。近者說。遠者來。子路

○哀公問於有若曰。年饑用不足。如之何。有若對

曰。盍徹乎。曰。二吾猶不足。如之何其徹也。對曰。百

姓足。君孰與不足。百姓不足。君孰與足。顏淵

○季康子問政於孔子曰。如殺無道以就有道。何

如。孔子對曰。子為政焉用殺。子欲善而民善矣。君

子之德風。小人之德草。草上之風必偃。顏淵

○子曰。道之以政。齊之以刑。民免而無恥。道之以

德。齊之以禮。有恥且格。為政

○子曰。聽訟吾猶人也。必也使無訟乎。顏淵

○子之武城。聞弦歌之聲。夫子莞爾而笑曰。割雞

焉用牛刀。子游對曰。昔者偃也聞諸夫子曰。君子

學道則愛人。小人學道則易使也。子曰。二三子。偃

之言是也。前言戲之耳。陽貨

○子曰。善人為邦百年。亦可以勝殘去殺矣。誠哉

是言也。子路

○子曰。如有王者。必世而後仁。子路

○子曰。善人教民七年。亦可以卽戎。子路

○子曰。以不教民戰。是謂棄之。子路

○子適衛。冉有僕。子曰。庶矣哉。冉有曰。既庶矣。又

何加焉。曰。富之。曰。既富矣。又何加焉。曰。教之。子路

○孟氏使陽膚爲士師。問於曾子。曾子曰。上失其

道。民散久矣。如得其情。則哀矜而勿喜。子張

知人

○樊遲問仁。子曰。愛人。問知。子曰。知人。樊遲未達。

子曰。舉直錯諸枉。能使枉者直。樊遲退。見子夏曰。

鄉也吾見於夫子而問知。子曰。舉直錯諸枉。能使

枉者直。何謂也。子夏曰。富哉言乎。舜有天下。選於

衆。舉皋陶。不仁者遠矣。湯有天下。選於衆。舉伊尹。

不仁者遠。顏淵

○哀公問曰。何爲則民服。孔子對曰。舉直錯諸枉

則民服。舉枉錯諸直則民不服。爲政

○仲弓爲季氏宰。問政。子曰。先有司。赦小過。舉賢

才。曰。焉知賢才而舉之。曰。舉爾所知。爾所不知。人

其舍諸。子路

○子曰。君子不以言舉人。不以人廢言。衛靈公

○子游爲武城宰。子曰。女得人焉爾乎。曰。有澹臺

滅明者。行不由徑。非公事。未嘗至於偃之室也。雍也

汎說

○子曰。道千乘之國。敬事而信。節用而愛人。使民以時。學而

○子張問仁於孔子。孔子曰。能行五者於天下。爲仁矣。請問之。曰。恭寬信敏惠。恭則不侮。寬則得衆。信則人任焉。敏則有功。惠則足以使人。陽貨

○子夏曰。君子信而後勞。其民未信則以爲厲己也。信而後諫。未信則以爲謗己也。子張

○子貢問政。子曰。足食。足兵。民信之矣。子貢曰。必

不得已而去。於斯三者何先。曰。去兵。子貢曰。必不

得已而去。於斯二者何先。曰。去食。自古皆有死。民

無信不立。顏淵

○季康子問。使民敬忠以勸。如之何。子曰。臨之以莊則敬。孝慈則忠。舉善而教。不能則勸。爲政

○子曰。民可使由之。不可知之。泰伯

○子路問政。子曰。先之勞之。請益。曰。勿倦。子路

○子張問政。子曰。居之無倦。行之以忠。顏淵

○子張問於孔子曰。何如斯可以從政矣。子曰。尊五美。屏四惡。斯可以從政矣。子張曰。何謂五美。子

曰。君子惠而不費。勞而不怨。欲而不貪。泰而不驕。威而不猛。子張曰。何謂惠而不費。子曰。因民之所利而利之。斯不亦惠而不費乎。擇可勞而勞之。又誰怨。欲仁而得仁。又焉貪。君子無衆寡。無大小。無敢慢。斯不亦泰而不驕乎。君子正其衣冠。尊其瞻視。儼然人望而畏之。斯不亦威而不猛乎。子張曰。何謂四惡。子曰。不教而殺。謂之虐。不戒視成。謂之暴。慢令致期。謂之賊。猶之與之也。出納之吝。謂之有司。堯曰

○子夏爲莒父宰。問政。子曰。無欲速。無見小利。欲

速。則不達。見小利。則大事不成。子路

○子路使子羔爲費宰。子曰。賊夫人之子。子路曰。有民人焉。有社稷焉。何必讀書然後爲學。子曰。是故惡夫佞者。先進

○子路曰。衛君待子而爲政。子將奚先。子曰。必也正名乎。子路曰。有是哉。子之迂也。奚其正。子曰。野哉。由也。君子於其所不知。蓋闕如也。名不正則言不順。言不順則事不成。事不成則禮樂不興。禮樂不興則刑罰不中。刑罰不中則民無所措手足。故君子名之必可言也。言之必可行也。君子於其言

無所苟而已矣。子路

○顏淵問為邦。子曰：行夏之時，乘殷之輅，服周之冕，樂則韶舞。放鄭聲，遠佞人。鄭聲淫，佞人殆。衛靈公

○子曰：惡紫之奪朱也，惡鄭聲之亂雅樂也，惡利口之覆邦家者。陽貨

○堯曰：咨爾舜，天之曆數在爾躬，允執其中，四海困窮，天祿永終。舜亦以命禹曰：予小子履，敢用玄牡，敢昭告于皇皇后帝，有罪不敢赦，帝臣不蔽，簡在帝心，朕躬有罪，無以萬方，萬方有罪，罪在朕躬。周有大賚，善人是富，雖有周親，不如仁人，百姓有

過，在予一人，謹權量，審法度，修廢官，四方之政行焉，興滅國，繼絕世，舉逸民，天下之民歸心焉，所重民，食喪祭，寬則得衆，信則民任焉，敏則有功，公則

說。堯曰

○子曰：居上不寬，為禮不敬，臨喪不哀，吾何以觀之哉。八佾

第三篇 前言往行

○子曰。大哉堯之為君也。巍巍乎唯天為大。唯堯則之。蕩蕩乎民無能名焉。巍巍乎其有成功也。煥乎其有文章。衛靈公

○子曰。巍巍乎舜禹之有天下也。而不與焉。秦伯

○子曰。禹吾無間然矣。菲飲食而致孝乎鬼神。惡衣服而致美乎黻冕。卑宮室而盡力乎溝洫。禹吾無間然矣。秦伯

○舜有臣五人。而天下治。武王曰。予有亂臣十人。孔子曰。才難。不其然乎。唐虞之際。於斯為盛。有婦

人焉。九人而已。三分天下有其二。以服事殷。周之德其可謂至德也已矣。秦伯

○周有八士。伯達。伯适。仲突。仲忽。叔夜。叔夏。季隨。季騶。微子

○子曰。夏禮吾能言之。杞不足徵也。殷禮吾能言之。宋不足徵也。文献不足故也。足則吾能徵之矣。八

○子張問。十世可知也。子曰。殷因於夏禮。所損益可知也。周因於殷禮。所損益可知也。其或繼周者。雖百世可知也。為政

○子曰。周監於二代。郁郁乎文哉。吾從周。八佾

○子貢曰。紂之不善。不如是之甚也。是以君子惡居下流。天下之惡皆歸焉。子張

○

○微子去之。箕子爲之奴。比干諫而死。孔子曰。殷有三仁焉。微子

○子曰。泰伯其可謂至德也已矣。三以天下讓。民無得而稱焉。泰伯

○齊景公有馬千駟。死之日。民無德而稱焉。伯夷叔齊餓于首陽之下。民到于今稱之。誠不以富。亦祇以異。其斯之謂與。季氏

○子曰。伯夷叔齊不念舊惡。怨是以希。公冶長

○子謂子產。有君子之道四焉。其行己也恭。其事上也敬。其養民也惠。其使民也義。公冶長

○或問子產。子曰。惠人也。問子西。曰。彼哉。彼哉。問管仲。曰。人也。奪伯氏駢邑三百。飯疏食。沒齒無怨言。憲問

言。憲問

○子路曰。桓公殺公子糾。召忽死之。管仲不死。曰未仁乎。子曰。桓公九合諸侯。不以兵車。管仲之力也。如其仁。如其仁。憲問

○子貢曰。管仲非仁者與。桓公殺公子糾。不能死。

又相之。子曰：管仲霸諸侯。一匡天下。民到于今受其賜。微管仲。吾其被髮左衽矣。豈若匹夫匹婦之爲諒也。自經於溝瀆。而莫知之。憲問

○子曰：管仲之器小哉。或曰：管仲儉乎。子曰：管氏有三歸。官事不攝。焉得儉。然則管仲知禮乎。曰：邦君樹塞門。管氏亦樹塞門。邦君爲兩君之好。有反坫。管氏亦有反坫。管氏而知禮。孰不知禮。八佾

○子曰：臧文仲居蔡山。節藻稅。何如其知也。公冶長

○子曰：臧文仲其竊位者與。知柳下惠之賢。而不與立也。衛靈公

○公叔文子之臣大夫僎。與文子同升諸公。子聞之。曰：可以爲文矣。憲問

○子貢問曰：孔文子何以謂之文也。子曰：敏而好學。不恥下問。是以謂之文也。公冶長

○子問公叔文子於公明賈曰：信乎。夫子不言。不笑。不取乎。公明賈對曰：以告者過也。夫子時然後言。人不厭其言。樂然後笑。人不厭其笑。義然後取。人不厭其取。子曰：其然。豈其然乎。憲問

○蘧伯玉使人於孔子。孔子與之坐。而問曰：夫子何爲。對曰：夫子欲寡其過。而未能也。使者出。子曰：

使乎使乎。憲問

○子曰。孟之反不伐。奔而殿。將入門。策其馬曰。非敢後也。馬不進也。雍也

○季文子三思而後行。子聞之曰。再斯可矣。公治長

○子謂衛公子荆。善居室。始有曰。苟合矣。少有曰。苟完矣。富有曰。苟美矣。子路

○子曰。孰謂微生高直。或乞醯焉。乞諸其鄰而與之。公治長

○子曰。我未見剛者。或對曰。申枨。子曰。枨也欲。焉得剛。公治長

○子路問成人。子曰。若臧武仲之知。公綽之不欲。卞莊子之勇。冉求之藝。文之以禮樂。亦可以為成人矣。曰。今之成人者何必然。見利思義。見危授命。久要不忘平生之言。亦可以為成人矣。憲問

○子曰。臧武仲以防求為後於魯。雖曰不要君。吾不信也。憲問

○子曰。孟公綽為趙魏老則優。不可以為滕薛大夫。憲問

○柳下惠為士師三黜。人曰。子未可以去乎。曰。直道而事人。焉往而不三黜。枉道而事人。何必去父

母之邦。微子

○子曰。直哉史魚。邦有道如矢。邦無道如矢。君子哉蘧伯玉。邦有道則仕。邦無道則可卷而懷之。蘧公

○子曰。甯武子邦有道則知。邦無道則愚。其知可及也。其愚不可及也。公治長

○子張問曰。令尹子文三仕爲令尹。無喜色。三已之。無愠色。舊令尹之政。必以告新令尹。何如。子曰。忠矣。曰。仁矣乎。曰。未知焉得仁。崔子弑齊君。陳文子有馬十乘。棄而違之。至於他邦。則曰。猶吾大夫崔子也。違之。之一邦。則又曰。猶吾大夫崔子也。違

之。何如。子曰。清矣。曰。仁矣乎。曰。未知焉得仁。公治長

○大師摯適齊。亞飯干適楚。三飯繚適蔡。四飯缺適秦。鼓方叔入於河。播鼗武入於漢。少師陽擊磬襄入於海。微子

○子曰。作者七人矣。憲問

○子曰。晉文公譎而不正。齊桓公正而不譎。憲問

○子曰。齊一變至於魯。魯一變至於道。雍也

○子曰。魯衛之政。兄弟也。子路

○子言衛靈公之無道也。康子曰。夫如是。奚而不喪。孔子曰。仲叔圉治賓客。祝鮀治宗廟。王孫賈治

軍旅。夫如是。奚其喪矣。憲問

○子曰。爲命。禘。禘。草創之。世叔討論之。行人子羽脩飾之。東里子產潤色之。憲問

○孔子曰。祿之去公室五世矣。政逮於大夫四世矣。故三桓之子孫微矣。季氏

○孔子謂季氏。八佾舞於庭。是可忍也。孰不可忍也。八佾

○三家者以雍徹。子曰。相維辟公。天子穆穆。奚取於三家之堂。八佾

○孔子曰。天下有道。則禮樂征伐自天子出。天下

無道。則禮樂征伐自諸侯出。自諸侯出。蓋十世希不失矣。自大夫出。五世希不失矣。陪臣執國命。三世希不失矣。天下有道。則政不在大夫。天下有道。則庶人不議。季氏

○逸民。伯夷。叔齊。虞仲。夷逸。朱張。柳下惠。少連。子曰。不降其志。不辱其身。伯夷。叔齊與。謂柳下惠。少連。降志辱身矣。言中倫。行中慮。其斯而已矣。謂虞仲。夷逸。隱居放言。身中清。廢中權。我則異於是。無可無不可。微子

第四篇 門人

○哀公問弟子孰為好學。孔子對曰。有顏回者。好學。不遷怒。不貳過。不幸短命死矣。今也則亡。未聞好學者也。雍也

○子曰。吾與回言。終日不違。如愚。退而省其私。亦足以發。回也不愚。為政

○子曰。回也非助我者也。於吾言無所不說。先進

○子謂子貢曰。女與回也孰愈。對曰。賜也何敢望回。回也聞一以知十。賜也聞一以知二。子曰。弗如也。吾與女弗如也。公冶長

○子畏於匡。顏淵後。子曰。吾以女為死矣。曰。子在。

回何敢死。先進

○子謂顏淵曰。用之則行。舍之則藏。惟我與爾有是夫。子路曰。子行三軍則誰與。子曰。暴虎馮河。死而無悔者。吾不與也。必也臨事而懼。好謀而成者也。述而

○顏淵死。子曰。噫。天喪予。天喪予。先進

○子曰。回也其庶乎。屢空。賜不受命而貨殖焉。億則屢中。先進

○子貢方人。子曰。賜也賢乎哉。夫我則不暇。憲問

○子貢問曰。賜也何如。子曰。女器也。曰。何器也。曰。瑚璉也。公冶長

○子貢問。師與商也孰賢。子曰。師也過。商也不及。曰。然則師愈與。子曰。過猶不及。先進

○子曰。道不行。乘桴浮于海。從我者其由與。子路聞之喜。子曰。由也好勇過我。無所取材。公冶長

○子曰。衣敝緼袍。與衣狐貉者立。而不恥者。其由也與。不忮不求。何用不臧。子路終身誦之。子曰。是道也何足以臧。子罕

○子曰。片言可以折獄者。其由也與。子路無宿諾。顏淵

○子曰。由之瑟奚為於丘之門。門人不敬子路。子曰。由也升堂矣。未入於室也。先進

○子謂仲弓曰。犁牛之子騂且角。雖欲勿用。山川其舍諸。雍也

○子謂子賤。君子哉若人。魯無君子。斯焉取斯。公冶長

○南宮适問於孔子曰。羿善射。臯盪舟。俱不得其死然。禹稷躬稼。而有天下。夫子不答。南宮适出。子曰。君子哉若人。尙德哉若人。憲問

○伯牛有疾。子問之。自牖執其手曰。亡之。命矣夫。斯人也而有斯疾也。斯人也而有斯疾也。雍也

○曾子曰。堂堂乎張也。難與並爲仁矣。子張

○子游曰。吾友張也。爲難能也。然而未仁。子張

○宰予晝寢。子曰。朽木不可雕也。糞土之牆不可朽也。於予與何誅。子曰。始吾於人也。聽其言而信其行。今吾於人也。聽其言而觀其行。於予與改是。公治長

○子路曾皙冉有公西華侍坐。子曰。以吾一日長乎爾。毋吾以也。居則曰。不吾知也。如或知爾。則何以哉。子路率爾而對曰。千乘之國。攝乎大國之間。加之以師旅。因之以饑饉。由也爲之。比及三年。可使有勇。且知方也。夫子哂之。求爾何如。對曰。方六

七十。如五六十。求也爲之。比及三年。可使足民。如其禮樂。以俟君子。赤爾何如。對曰。非曰能之。願學焉。宗廟之事。如會同。端章甫。願爲小相焉。點爾何如。鼓瑟希。鏗爾。舍瑟而作。對曰。異乎三子者之撰。子曰。何傷乎。亦各言其志也。曰。莫春者。春服既成。冠者五六人。童子六七人。浴乎沂。風乎舞雩。詠而歸。夫子喟然歎曰。吾與點也。三子者出。曾皙後。曾皙曰。夫三子者之言何如。子曰。亦各言其志也已矣。曰。夫子何哂由也。曰。爲國以禮。其言不讓。是故哂之。唯求則非邦也與。安見方六七十。如五六十

而非邦也者。唯赤則非邦也與。宗廟會同。非諸侯而何。赤也為之小。孰能為之大。先進

○孟武伯問。子路仁乎。子曰。不知也。又問。子曰。由也。千乘之國。可使治其賦也。不知其仁也。求也何如。子曰。求也。千室之邑。百乘之家。可使為之宰也。不知其仁也。赤也何如。子曰。赤也。束帶立於朝。可使與賓客言也。不知其仁也。公冶長

○季康子問。仲由可使從政也與。子曰。由也。果於從政乎。何有。曰。賜也。可使從政也與。曰。賜也。達於從政乎。何有。曰。求也。可使從政也與。曰。求也。藝於

從政乎。何有。雍也

○子曰。雍也可使南面。仲弓問。子桑伯子。子曰。可也。簡。仲弓曰。居敬而行簡。以臨其民。不亦可乎。居簡而行簡。無乃大簡乎。子曰。雍之言然。雍也

○季氏富於周公。而求也為之聚斂。而附益之。子曰。非吾徒也。小子鳴鼓而攻之。可也。先進

○季氏使閔子騫為費宰。閔子騫曰。善為我辭焉。如有復我者。則吾在汶上矣。雍也

○魯人為長府。閔子騫曰。仍舊貫。如之何。何必改作。子曰。夫人不言。言必有中。先進

○哀公問社於宰我。宰我对曰：夏后氏以松，殷人以栢，周人以栗。曰：使民戰栗。子聞之曰：成事不說，遂事不諫。既往不咎。八倍

○子謂公冶長可妻也。雖在縲紲之中，非其罪也。以其子妻之。子謂南容：邦有道不廢，邦無道免於刑戮。以其兄之子妻之。公冶長

○閔子侍側，閭閻如也。子路行行如也。冉有子貢侃侃如也。子樂。若由也不得其死然。先進

○柴也愚，參也魯，師也辟，由也喭。先進

○子在陳曰：歸與歸與。吾黨之小子狂簡，斐然成

章，不知所以裁之。公冶長

○子曰：從我於陳蔡者，皆不及門也。德行顏淵、閔子騫、冉伯牛、仲弓。言語宰我、子貢。政事冉有、季路。文學子游、子夏。先進

第五篇 孔子

第一章 世家

史記世家曰。孔子名丘。字仲尼。其先宋人。父叔梁紇。母顏氏。以魯襄公二十二年。庚戌之歲。十一月庚子。生孔子於魯昌平鄉陬邑。爲兒嬉戲。常陳俎豆。設禮容。及長。爲委吏。料量平。爲司櫛吏。畜蕃息。適周。問禮於老子。既反而。弟子益進。昭公二十五年甲申。孔子年三十五。昭公奔齊。魯亂。於是適齊。爲高昭子家臣。以通乎景公。公欲封以尼谿之田。晏嬰不可。公惑之。孔子遂行。反乎魯。定公元年壬

辰。孔子年四十三。而季氏強僭。其臣陽虎作亂。專政。故孔子不仕而退。修詩書禮樂。弟子彌衆。九年庚子。孔子年五十一。公山不狃以費畔季氏。召孔子。欲往而卒不行。定公以孔子爲中都宰。一年四方則之。遂爲司空。又爲大司寇。十年辛丑。相定公會齊侯于夾谷。齊人歸魯侵地。十二年癸卯。使仲由爲季氏宰。墮三都。收其甲兵。孟子不肯墮。成圍之。不克。十四年乙巳。孔子年五十六。攝行相事。誅少正卯。與聞國政。三月魯國大治。齊人歸女樂。以沮之。季桓子受之。郊又不致。燔俎於大夫。孔子行。

適衛。主於子路妻兄顏濁鄒家。適陳過匡。匡人以爲陽虎而拘之。既解。還衛。主蘧伯玉家。見南子。去適宋。司馬桓魋欲殺之。又去適陳。主司城貞子家。居三歲而反于衛。靈公不能用。晉趙氏家臣佛肸以中牟畔。召孔子。孔子欲往。亦不果。將西見趙簡子。至河而反。又主蘧伯玉家。靈公問陳。不對而行。復如陳。季桓子卒。遺言謂康子。必召孔子。其臣止之。康子乃召冉求。孔子如蔡及葉。楚昭王將以書社地封孔子。令尹子西不可。乃止。又反乎衛。時靈公已卒。衛君輒欲得孔子爲政。而冉求爲季氏將。

與齊戰有功。康子乃召孔子。而孔子歸魯。實哀公之十一年丁巳。而孔子年六十八矣。然魯終不能用孔子。孔子亦不求仕。乃叙書傳禮記。刪詩正樂。序易彖繫象說卦文言。弟子蓋三千焉。身通六藝者七十二人。十四年庚申。魯西狩獲麟。孔子作春秋。明年辛酉。子路死於衛。十六年壬戌。四月己丑。孔子卒。年七十三。葬魯城北泗上。弟子皆服心喪。三年而去。唯子貢廬於冢上。凡六年。孔子生鯉。字伯魚。生伋。字子思。作中庸。

第二章 學德

○子曰。吾十有五而志于學。三十而立。四十而不惑。五十而知天命。六十而耳順。七十而從心所欲。不踰矩。為政

○子曰。十室之邑。必有忠信如丘者焉。不如丘之好學也。公治長

○子曰。我非生而知之者。好古敏以求之者也。述而

○子曰。蓋有不知而作之者。我無是也。多聞擇其善者而從之。多見而識之。知之次也。述而

○子曰。加我數年。五十以學易。可以無大過矣。述而

○子曰。述而不作。信而好古。竊比於我老彭。述而

○葉公問孔子於子路。子路不對。子曰。女奚不曰。其為人也發憤忘食。樂以忘憂。不知老之將至云爾。述而

○大宰問於子貢曰。夫子聖者與。何其多能也。子貢曰。固天縱之將聖。又多能也。子聞之曰。大宰知我乎。吾少也賤。故多能鄙事。君子多乎哉。不多也。牢曰。子云。吾不試。故藝。子罕

○子曰。出則事公卿。入則事父兄。喪事不敢不勉。不為酒困。何有於我哉。子罕

○子曰。君子道者三。我無能焉。仁者不憂。知者不惑。勇者不懼。子貢曰。夫子自道也。憲問

○子曰。默而識之。學而不厭。誨人不倦。何有於我哉。述而

○子曰。若聖與仁。則吾豈敢。抑為之不厭。誨人不倦。則可謂云爾已矣。公西華曰。正唯弟子不能學也。述而

○達巷黨人曰。大哉孔子。博學而無所成名。子聞之。謂門弟子曰。吾何執。執御乎。執射乎。吾取御矣。子罕

○子罕言利。與命與仁。子罕

○子之所慎。齊戰疾。述而

○子不語怪力亂神。述而

○子絕四。毋意。毋必。毋固。毋我。子罕

○子釣而不網。弋不射宿。述而

○廐焚。子退朝曰。傷人乎。不問馬。鄉黨

○子與人歌而善。必使反之。而後和之。述而

○子華使於齊。冉子為其母請粟。子曰。與之釜。請

益。曰。與之庾。冉子與之粟五秉。子曰。赤之適齊也。

乘肥馬。衣輕裘。吾聞之也。君子周急不繼富。原思

爲之宰。與之粟九百。辭。子曰。毋。以與爾鄰里鄉黨

乎。雍也

○冉子退朝。子曰。何晏也。對曰。有政。子曰。其事也。如有政。雖不吾以。吾其與聞之。子路

○陳成子弑簡公。孔子沐浴而朝。告於哀公曰。陳恒弑其君。請討之。公曰。告夫三子。孔子曰。以吾從大夫之後。不敢不告也。君曰。告夫三子者。之。三子告。不可。孔子曰。以吾從大夫之後。不敢不告也。憲問

○子疾病。子路請禱。子曰。有諸。子路對曰。有之。誅曰。禱爾于上下神祇。子曰。丘之禱久矣。述而

○王孫賈問曰。與其媚於奧。寧媚於竈。何謂也。子曰。不然。獲罪於天。無所禱也。八佾

○子疾病。子路使門人爲臣。病間曰。久矣哉。由之行詐也。無臣而爲有臣。吾誰欺。欺天乎。且予與其死於臣之手也。無寧死於二三子之手乎。且予縱不得大葬。予死於道路乎。子罕

○儀封人請見。曰。君子之至於斯也。吾未嘗不得見也。從者見之。出曰。二三子何患於喪乎。天下之無道也久矣。天將以夫子爲木鐸。八佾

第三章 教誨

○子曰。賜也。女以予爲多學而識之者與。對曰。然。非與。曰。非也。予一以貫之。衛靈公

○子曰。參乎。吾道一以貫之。曾子曰。唯。子出門人

問曰。何謂也。曾子曰。夫子之道。忠恕而已矣。里仁

○

○子曰。惟上知與下愚不移。陽貨

○子曰。性相近。習相遠也。陽貨

○子曰。有教無類。衛靈公

○子曰。中人以上可以語上也。中人以下不可以

語上也。雍也

○子曰。自行束脩以上。吾未嘗無誨焉。述而

○子以四教。文行忠信。述而

○子曰。二三子以我爲隱乎。吾無隱乎爾。吾無行

而不與二三子者。是丘也。述而

○子曰。吾有知乎哉。無知也。有鄙夫問於我。空空

如也。我叩其兩端而竭焉。子罕

○子曰。不憤不啓。不悱不發。舉一隅不以三隅反。

則不復也。述而

○子貢曰。夫子之文章可得而聞也。夫子之言性

與天道不可得而聞也。公冶長

○子曰。人之生也直。罔之生也幸而免。雍也

○原壤夷俟。子曰。幼而不孫弟。長而無述焉。老而

不死。是為賊。以杖叩其脛。憲問

○子曰。攻乎異端。斯害也已。為政

○子曰。吾之於人也。誰毀誰譽。如有所譽者。其有

所試矣。斯民也。三代之所以直道而行也。衛靈公

○互鄉難與言。童子見。門人惑。子曰。與其進也。不

與其退也。唯何甚。人潔己以進。與其潔也。不保其

往也。述而

○闕黨童子將命。或問之曰。益者與。子曰。吾見其居於位也。見其與先生並行也。非求益者也。欲速

成者也。憲問

○子路問。聞斯行諸。子曰。有父兄在。如之何其聞

斯行之。冉有問。聞斯行諸。子曰。聞斯行之。公西華

曰。由也問。聞斯行諸。子曰。有父兄在。求也問。聞斯

行諸。子曰。聞斯行之。赤也惑。敢問。子曰。求也退。故

進之。由也兼人。故退之。先進

○孺悲欲見孔子。孔子辭以疾。將命者出戶。取瑟

而歌。使之聞之。陽貨

○子曰。予欲無言。子貢曰。子如不言。則小子何述焉。子曰。天何言哉。四時行焉。百物生焉。天何言哉。陽貨

第四章 處世

○子貢曰。有美玉於斯。韞匱而藏諸。求善賈而沽諸。子曰。沽之哉。沽之哉。我待賈者也。子罕

○陽貨欲見孔子。孔子不見。歸孔子豚。孔子時其亡也。而往拜之。遇諸塗。謂孔子曰。來。予與爾言。曰。懷其寶而迷其邦。可謂仁乎。曰。不可。好從事而亟失時。可謂知乎。曰。不可。日月逝矣。歲不我與。孔子曰。諾。吾將仕矣。陽貨

○冉有曰。夫子爲衛君乎。子貢曰。諾。吾將問之。入曰。伯夷叔齊何人也。曰。古之賢人也。曰。怨乎。曰。求

仁而得仁。又何怨。出曰。夫子不為也。述而

○衛靈公問陳於孔子。孔子對曰。俎豆之事則嘗聞之矣。軍旅之事未之學也。明日遂行。在陳絕糧。從者病莫能興。子路愠見曰。君子亦有窮乎。子曰。君子固窮。小人窮斯濫矣。衛靈公

○子曰。天生德於予。桓魋其如予何。述而

○齊景公待孔子曰。若季氏則吾不能。以季孟之間待之。曰。吾老矣。不能用也。孔子行。微子

○齊人歸女樂。季桓子受之。三日不朝。孔子行。微子

○佛肸召。子欲往。子路曰。昔者由也聞諸夫子曰。

親於其身為不善者。君子不入也。佛肸以中牟畔。子之往也。如之何。子曰。然。有是言也。不曰堅乎。磨而不磷。不曰白乎。涅而不緇。吾豈匏瓜也哉。焉能繫而不食。陽貨

○子見南子。子路不說。夫子矢之曰。予所否者。天厭之。天厭之。雍也

○公山弗擾以費畔。召。子欲往。子路不說曰。未之也。已。何必公山氏之之也。子曰。夫召我者而豈徒哉。如有用我者。吾其為東周乎。陽貨

○子曰。苟有用我者。期月而已可也。三年有成。子路

○子畏於匡。曰：文王既沒，文不在茲乎？天之將喪斯文也，後死者不得與於斯文也。天之未喪斯文也，匡人其如予何？子罕

○公伯寮愬子路於季孫。子服景伯以告。曰：夫子固有惑志於公伯寮，吾力猶能肆諸市朝。子曰：道之將行也與，命也；道之將廢也與，命也。公伯寮其如命何？憲問

○子路從而後，遇丈人以杖荷篠。子路問曰：子見夫子乎？丈人曰：四體不勤，五穀不分，孰爲夫子？植

其杖而芸。子路拱而立。止。子路宿，殺雞爲黍而食之。見其二子焉。明日，子路行以告。子曰：隱者也。使子路反見之。至則行矣。子路曰：不仕無義，長幼之節不可廢也。君臣之義，如之何其廢之？欲潔其身而亂大倫，君子之仕也，行其義也。道之不行，已知之矣。微子

○子路宿於石門。晨門曰：奚自？子路曰：自孔氏。曰：是知其不可而爲之者與？憲問

○微生畝謂孔子曰：丘何爲？是栖栖者與？無乃爲佞乎？孔子曰：非敢爲佞也，疾固也。憲問

○長沮桀溺耦而耕。孔子過之。使子路問津焉。長沮曰。夫執輿者為誰。子路曰。為孔丘。曰。是魯孔丘與。曰。是也。曰。是知津矣。問於桀溺。子路曰。子為誰。曰。為仲由。曰。是魯孔丘之徒與。對曰。然。曰。滔滔者天下皆是也。而誰以易之。且而與其從辟人之士也。豈若從辟世之士哉。耰而不輟。子路行以告。夫子憮然曰。鳥獸不可與同群。吾非斯人之徒與而誰與。天下有道。丘不與易也。微子

○子擊磬於衛。有荷蕢而過孔氏之門者。曰。有心哉。擊磬乎。既而曰。鄙哉。硜硜乎。莫己知也。斯已而已矣。深則厲。淺則揭。子曰。果哉。末之難矣。憲問

○楚狂接輿歌而過孔子曰。鳳兮鳳兮。何德之衰。往者不可諫。來者猶可追。已而已而。今之從政者殆而。孔子下欲與之言。趨而辟之。不得與之言。微子

○子曰。莫我知也夫。子貢曰。何為其莫知子也。子曰。不怨天。不尤人。下學而上達。知我者其天乎。憲問

○子曰。富而可求也。雖執鞭之士。吾亦為之。如不可求。從吾所好。述而

○子曰。觚不觚。觚哉。觚哉。雍也

○子曰。夷狄之有君。不如諸夏之亡也。八佾

○子欲居九夷。或曰。陋如之何。子曰。君子居之。何

陋之有。子罕

○子曰。不有祝鮀之佞。而有宋朝之美。難乎免於

今之世矣。雍也

○子曰。鳳鳥不至。河不出圖。吾已矣夫。子罕

○子曰。甚矣吾衰也。久矣吾不復夢見周公。述而

○子曰。吾自衛反魯。然後樂正。雅頌各得其所。子罕

第五章 禮容

○子之燕居。申申如也。天天如也。述而

○朝與下大夫言。侃侃如也。與上大夫言。誾誾如

也。君在。蹶蹶如也。與與如也。鄉黨

○君召使擯。色勃如也。足躩如也。揖所與立。左右

手。衣前後。襜如也。趨進。翼如也。賓退。必復命曰。賓

不顧矣。鄉黨

○入公門。鞠躬如也。如不容。立不中門。行不履闕。

過位。色勃如也。足躩如也。其言似不足者。攝齊升

堂。鞠躬如也。屏氣似不息者。出降一等。逞顏色怡

怡如也。沒階趨翼如也。復其位蹶蹶如也。鄉黨

○執圭鞠躬如也。如不勝。上如揖。下如授。勃如戰色。足踏踏如有循。享禮有容色。私覲愉愉如也。鄉黨

○君子不以紺緞飾。紅紫不以爲褻服。當暑袗絺綌。必表而出之。緇衣羔裘。素衣麀裘。黃衣狐裘。褻裘長。短右袂。必有寢衣。長一身有半。狐貉之厚以居。去喪無所不佩。非帷裳必殺之。羔裘玄冠不以弔。吉月必朝服而朝。鄉黨

○齊必有明衣布。齊必變食。居必遷坐。鄉黨

○食不厭精。膾不厭細。食饁而餲。魚餒而肉敗不

食。色惡不食。臭惡不食。失飪不食。不時不食。割不正不食。不得其醬不食。肉雖多不使勝食氣。唯酒無量。不及亂。沽酒市脯不食。不撤薑食。不多食。祭於公。不宿肉。祭肉不出三日。出三日不食之矣。食不語。寢不言。雖蔬食菜羹。瓜祭。必齊如也。鄉黨

○席不正不坐。鄉黨

○鄉人飲酒。杖者出。斯出矣。鄉人傺。朝服而立於阼階。鄉黨

○問人於他邦。再拜而送之。康子饋藥。拜而受之。曰。丘未達。不敢嘗。鄉黨

○君賜食。必正席先嘗之。君賜腥。必熟而薦之。君賜生。必畜之。侍食於君。君祭先飯。疾君視之。東首加朝服。拖紳。君命召。不俟駕行矣。鄉黨

○朋友死。無所歸。曰。於我殯。朋友之饋。雖車馬。非祭肉不拜。鄉黨

○寢不尸。居不容。見齊衰者。雖狎。必變。見冕者與瞽者。雖褻。必以貌。凶服者。式之。式。負版者。有盛饌。必變色而作。迅雷風烈。必變。鄉黨

○子見齊衰者。冕衣裳者。與瞽者。見之。雖少。必作。過之。必趨。子罕

○師冕見。及階。子曰。階也。及席。子曰。席也。皆坐。子告之曰。某在斯。某在斯。師冕出。子張問曰。與師言之道與。子曰。然。固相師之道也。衛靈公

○子入大廟。每事問。或曰。孰謂鄒人之子知禮乎。入大廟。每事問。子聞之曰。是禮也。八佾

○子食於有喪者之側。未嘗飽也。子於是日哭。則不歌。述而

○升車。必正立執綏。車中不內顧。不疾言。不親指。鄉黨
○色斯舉矣。翔而後集。曰。山梁雌雉。時哉。時哉。子路共之。三嗅而作。鄉黨

○邦君之妻。君稱之曰夫人。夫人自稱曰小童。邦人稱之曰君夫人。稱諸異邦曰寡小君。異邦人稱之亦曰君夫人。季氏

第六章 頌

○子禽問子貢曰。夫子至於是邦也。必聞其政。求之與。抑與之與。子貢曰。夫子溫良恭儉讓以得之。夫子之求之也。其諸異乎人之求之與。

○衛公孫朝問於子貢曰。仲尼焉學。子貢曰。文武之道未墜於地。在人。賢者識其大者。不賢者識其小者。莫不有文武之道焉。夫子焉不學。而亦何常師之有。子張

○叔孫武叔毀仲尼。子貢曰。無以爲也。仲尼不可毀也。他人之賢者。丘陵也。猶可踰也。仲尼日月也。

無得而踰焉。人雖欲自絕。其何傷於日月乎。多見其不知量也。子張

○陳子禽謂子貢曰。子爲恭也。仲尼豈賢於子乎。子貢曰。君子一言以爲知。一言以爲不知。言不可不慎也。夫子之不可及也。猶天之不可階而升也。夫子之得邦家者。所謂立之斯立。道之斯行。綏之斯來。動之斯和。其生也榮。其死也哀。如之何其可及也。子張

○叔孫武叔語大夫於朝曰。子貢賢於仲尼。子服景伯以告子貢。子貢曰。譬之宮牆。賜之牆也及肩。

窺見室家之好。夫子之牆數仞。不得其門而入。不見宗廟之美。百官之富。得其門者或寡矣。夫子之云。不亦宜乎。子張

○顏淵喟然歎曰。仰之彌高。鑽之彌堅。瞻之在前。忽焉在後。夫子循循然善誘人。博我以文。約我以禮。欲罷不能。既竭吾才。如有所立卓爾。雖欲從之。末由也已。子罕

附錄 論語序

○何氏曰。魯論語二十篇。齊論語別有問王知道。凡二十二篇。其二十篇中。章句頗多於魯論。古論出孔子壁中。分堯曰下章子張問。以爲一篇。有兩子張。凡二十一篇。篇次不與齊魯論同。

○程子曰。論語之書成於有子曾子之門人。故其書獨二子以子稱。

○程子曰。讀論語。有讀了全然無事者。有讀了後其中得一兩句喜者。有讀了後知好之者。有讀了後直有不知手之舞之。足之蹈之者。

○程子曰。今人不會讀書。如讀論語。未讀時是此等人。讀了後。又只是此等人。便是不會讀。

○程子曰。頤自十七八。讀論語。當時已曉文義。讀之愈久。但覺意味深長。

論語類編終

明治三十一年三月十五日印刷
同三十一年三月廿五日發行

定價金三十五錢

編次者 松田東

參校者 井口榮治


發行者 吉川半七

東京市京橋區南傳馬町一丁目十二番地

印刷者 野村宗十郎

東京市京橋區築地三丁目十五番地

版權
所有



特35
247

008715-000-9

特35-247

論語類編

松田 東/編

M31

AAC-1692

